

## На литии стихиры

### Глас 1. [Киприаново:]

Умных сил архистратизи, предстояще непрестанно Владычню престолу, молитесь ко Господу, мир миру даровати, и душам нашим велию милость.

[Арсениево:] Чинопачальник вышних сил Михаил первостоятель Божественных чинов, днесь нас к торжеству созва, иже всегда с нами ходяй, и сохраняяй вся от всякаго диаволя обстояния. Приидите убо празднующыи и христороубцы, цветы добродетелей взявше, чистыми помысли, и совестью благостоянною, архангелов собор почтим: той бо непрестанно Богу предстоя, и Трисвятую песнь воспевая, молит спастися душам нашим.

Глас 2: [Студитово:] Невещественное существо, умных сил предстательствующе, и Трисолнечныя славы блистаньями, светодающе вселенней архистратизи, непрестанным гласом Трисвятую песнь воспевае. Темже молитесь, спастися душам нашим.

### Глас тойже:

[Арсениево:] Невещественный престол окружающе, умная существа, божественнии безтелеснии, Трисвятую песнь правителю Богу, пламенными устами поете: Святыи Боже, Отче Безначальный. Святыи Крепкий, Сыне Собезначальный. Святыи Безсмертный, Единосущный Душе, Отцу и Сыну прославляемый.

[Анатолия:] Безтелесными устами, и умными усты ангельстии чини непрестанное пение приносят Твоему неприступному Божеству, Господи, и уми чистии и служителие Твоея славы хвалят Тя, Господи, с нимиже Михаил безтелесный, и Гавриил зело благолепнейший, и первостоятелие горних сил, архистратизи ангельстии, учредителие наши днесь быша: песни песней повелевающе нам пети неприступней славе Твоей Человеколюбче, ейже молятся непрестанно за души наша.

### Слава: глас 4:

Огненными устами поют Тя херувими, Христе Боже, безтелесными же усты, немолчно славословит Тя архангельский лик: Михаил же, архистратиг вышних сил, победную песнь непрестанно приносит славе Твоей. Той бо нас днесь озари к торжеству светлому, възбръцати достойне псаломски хвалу Трисвятую бранными устами, яко всяческая Твоего хваления исполнишася, и подаеши миру тем велию милость.

### И ныне: глас тойже. [Георгия Никомидийскаго:]

Днесь Боговместимый храм Богородица, в храм Господень приводится, и Захария Сию подъемлет: днесь святая святых радуются, и лик ангельский таинственно торжествует. С нимиже и мы празднующе днесь, с Гавриилом возопиим: радуйся Благодатная, Господь с Тобою, имей велию милость.